

氏族典第四百三十五卷

左姓部彙考

鄭樵通志 以族爲氏

左氏姜姓齊公族有左右公子因以爲氏楚有左史倚相左史老者以爲左史官故亦爲左氏望出濟陽 臣謹按所著春秋傳卽倚相之後世爲楚史官非左丘明明居左丘爲左丘氏非左氏也

廖用賢尙友錄 左姓

左濟陽商音

左姓部列傳

上古 左徹

按劉恕外紀黃帝鑄三鼎於荆山之陽鼎成崩其臣左徹取衣冠几杖而廟祀之

周 左儒

按萬姓統譜宣王將殺杜伯左儒爭之九復不許儒曰君道友逆則順君以誅友友道君逆則帥友

以違君王怒左儒曰士不枉義以從死不易言以求生臣能明君之過以正杜伯之無罪王殺杜伯左儒死之

左伯桃

按尚友錄伯桃燕人與羊角哀爲友聞楚王善待士乃同入楚值雨雪糧少伯桃乃併糧與哀令入事楚自餓死於空樹下哀至楚爲上大夫乃言於楚王備禮以葬伯桃

左鄢父

按左傳僖公二十四年王出適鄭使左鄢父告于秦

左人郢

按史記仲尼弟子列傳左人郢字行注鄭元曰魯人

漢 左咸

按漢書儒林傳顏安樂事眭孟受公羊春秋安樂授冷豐豐授琅瑯左咸咸爲郡守九卿徒衆尤盛

後漢 左于

按萬姓統譜于光武軍師

左恢

按萬姓統譜恢曲阿人官至尙書京師稱其志高後遷會稽太守

左伯

按萊州府志伯字子邑東萊人名與毛弘等能作紙漢興有紙代簡至和帝時蔡倫工爲之而子邑尤得其妙

左雄

按後漢書左雄傳雄字伯豪南郡涅陽人安帝時舉孝廉稍遷冀州刺史永建初公車徵拜議郎時順帝新立大臣憊怠朝多闕政雄數言事其辭深切虞翊薦之拜尙書遷尙書令陽嘉元年雄上言郡國孝廉出則宰民宣協風教若其面牆則無所施用請自今年不滿四十不得察舉帝從之自是牧守畏慄莫敢輕舉迄於永熹察選清平多得其人遷司隸校尉坐法免後復爲尙書永和三年卒

左原

按萬姓統譜原陳留人教郡學生犯法郭林宗勸令責躬原納其言

左稱

按後漢書單超傳延熹八年司隸校尉韓演奏左悺罪惡及其兄太僕南鄉侯稱請託州郡聚斂爲姦賓客放縱侵犯吏民悺稱皆自殺

左悺

按後漢書單超傳左悺河南平陰人桓帝初超爲中常侍悺爲小黃門史梁冀驕橫帝不平延熹二年帝呼入室議誅之悺遷中常侍封上蔡侯八年司隸校尉韓演奏悺罪惡悺自殺

左敏

按後漢書單超傳中常侍左悺弟敏爲陳留太守

左慈

按後漢書左慈傳慈字元放廬江人也少有神道曹操欲收殺之慈乃卻入壁中霍然不知所在或見於市者又捕之而市人皆變形與慈同莫知誰是後人逢慈於陽城山頭因復逐之遂入走羊羣

莫知所取焉

晉 左思

按晉書左思傳思字太冲齊國臨淄人也其先齊之公族有左右公子因爲氏焉家世儒學父雍起小吏以能擢授殿中侍御史思貌寢口訥而辭藻壯麗欲賦三都構思十年及賦成張華見而歎曰班張之流也齊王冏命爲記室督辭疾不就及張方縱暴都邑舉家適冀州數歲以疾終

唐 左匡政

按萬姓統譜匡政字難當涇縣人生而奇異長有智力隋末兵亂匡政率衆保障鄉里衆推爲總管武德中輔公祏及匡政閉城固守李大亮以兵援之公祏遂敗以功授宣城大都督封載國公

左紹齊

按萬姓統譜紹齊難當長子襲載國公弟紹芳以軍功陞淮南指揮使

左振

按尙友錄振肅宗朝爲黃州守時王璵以祠禱得相遣女巫乘傳分禱天下名山大川振斬之州人

歌曰吾鄉有鬼巫惑人人不知天子正尊信左公能殺之

宋 左書言

按江西通志書言永新人元豐進士授鄧州教授嘗括廢田三千頃以贍生徒

左膚

按宋史錢適傳左膚廬州人用安惇薦爲御史遷侍御史累至刑兵戶三尚書以樞密直學士知河南府改永興軍卒

左斷炎

按尙友錄斷炎字榮叔涇縣人治禮易二經喜吟咏明脩煉之術任醫學教諭休退愛山水之勝以琴鶴自娛忽一日告家屬云吾當於某日逝矣至期無疾衣冠正坐而歿

左慶延

按江西通志慶延永新人紹興進士秦檜欲妻以孫女力辭不就或曰不利慶延曰士一失身則無以復立苟不利吾退而山林亦自多矣遂西歸檜憾之十年不調後以太學博士終

左昌詩

按萬姓統譜昌詩番禺人淳熙中以朝散郎知真州奉法循禮節用愛人至於建府庾繕溝壘訓習兵戎夙夜殫力如開大橫河以便江舟艤泊以其餘力重建壯觀扁秀諸亭可以見其能矣

左彥武

按萬姓統譜彥武涇縣人難當之後操履方正少以文行名舉淳熙進士調廣平尉歷知仁和江陰二縣轉通判無爲軍累著能聲陞知平江府轉京兆尹孫泰成領鄉薦寶慶中爲太學學錄轉博士應端平甲午求言詔除翰林侍講淳祐戊申辭歸植松竹梅於亭扁其亭曰三友其子孝先世興同舉咸淳進士世華以明經爲國子監助教陞翰林直閣

左譽

按江西通志譽字元規永新人開禧進士奉使不辱君命十年寇不敢南窺

左師召

按江西通志師召永新人嘉定進士守新州始終廉潔秩滿致仕請祠去

左夢高

按萬姓統譜夢高嘉定庚午鄉試易魁次年監補都魁升太學癸酉丙子壬午連領監舉終修職郎
麓平縣尉

左譽謨

按萬姓統譜譽謨紹定辛卯鄉舉次年登第授復州景陵尉值金兵圍城城陷被執母妻偕子同時
遇害朝廷命祠於岳陽賜額閔忠特贈承事郎其誥詞云爾以一尉之微能爲張巡許遠所爲風節
凜凜今猶有生氣朕甚嘉嘆而重憫惻岳陽立廟視睢陽無異復贈員外郎賞延於嗣九京可作尙
慰欽哉

左文翁

按萬姓統譜文翁有德曾孫字漢老歷袁州紹興江州教授終宣義郎致仕

金 左企弓

按金史左企弓傳企弓字君財八世祖皓後唐棣州刺史以行軍司馬戍燕遼取燕使守薊因家焉

企弓中進士再遷萊州觀察判官自御史出爲中京副留守累遷知三司使事天慶末拜中書侍郎平章事時遼主聞金已克中京將西幸以避之企弓諫不聽遼主自鴛鴦灤亾保陰山秦晉國王耶律捏里自立改元德興企弓加侍中太祖駐蹕燕京城南企弓等奉表降太祖俾復舊職將赴廣寧張覺使人殺之諡恭烈

左泌

按金史左企弓傳泌字長源企弓長子也仕遼官至棣州刺史從企弓歸朝擢西上閤門使從宋王宗望南伐破真定有功知祁州歷刺澤潞等州貞元初爲濬州防禦使遷陝西路轉運使封戴國公卒

左淵

按金史左企弓傳泌弟淵累官燕京副留守歷河北東路中都路都轉運使淵貪鄙三任漕事務以錢穀自營大定二年改沁南軍節度使坐前爲中都轉運嘗盜用官材木除名

左光慶

按金史左企弓傳淵子光慶字君錫以廕補閤門祇候遷西上閤門副使光慶好古讀書識大義喜爲詩善篆隸尤工大字世宗行郊禮受尊號及受命寶皆光慶篆人稱其有法遷宣徽使二十五年卒

元 左祥

按萬姓統譜祥盱江人初任翰林從事受知於學士吳澄泰定乙丑授承直郎來爲香山縣尹留心政教嘗作勸學文以訓社學子弟一時士習皆知向往習俗偷薄則又刻諭俗編以警切之自是頑梗之氓漸知格心矣尋遷儒學修義齋時與士子講論濂洛關閩之學咸有所依歸學制有未備者旣調官潮州路經歷猶留心移書必備而後已吳澄稱其政有三善云後改知增城其政如香山擢知萬州卒今香山增城皆祠之

明 左經

按萬姓統譜經字載道眉州人洪武初由儒士舉累官興山教諭博通經史文章典雅蜀人以左五經稱之蜀士之有聲於進士科者多出其門所著有武昌集

左獻

按萬姓統譜獻廣宗人洪武中由太學生歷官戶部主事勤於職務薦陞浙江布政司左叅議永樂初召爲刑部右侍郎

左孟誠

按萬姓統譜孟誠山東人洪武中知南雄府因城東隙地築桑園十畝教民種桑民皆知以養蠶爲業

左洋

按萬姓統譜洋字有瀾涇縣人由監生洪武中擢授大理寺評事永樂癸未陞刑部員外郎擢禮部祠祭司郎中拜應天府丞和早朝詩稱善云日射天門散曉寒梨垣鐘嚮漏聲殘金爐香靄浮雙闕玉笋班聯萃百官譯使獻琛封未啟侍臣題奏墨初乾鯁生幸際文明會忠義當思補報難

左激

按萬姓統譜激字有昂涇縣人難當之後爲醫學訓科性醇厚不尙華靡善吟咏旁通陰陽醫卜之

術遠淫祀絕浮圖冠婚喪祭遵古禮以倡俗以子景貴贈監察御史

左常

按萬姓統譜常南城人永樂戊戌進士歷叅政

左景

按萬姓統譜景字孟化涇縣人激之子舉宣德丙午鄉試任陵川學訓導啟迪有方擢河南道監察御史居外艱服闋改山西道風采獨著捕盜畿甸平反誣坐死者十一人按雲南監平麓川軍旣至曲靖苗賊犯城令民督戰生擒有功有白金紵絲之賜以忤重臣補四川僉事

左鼎

按明外史左鼎傳鼎字周器永新人正統七年進士授南京御史改北巡按山西乘輿北狩盡心畫戰守尋以山東河南饑遣鼎巡視民賴以安景泰四年以災異偕同官陳救弊恤民七事鼎居官清勤卓有聲譽御史練綱以敢言名而鼎尤善爲章奏京師語曰左鼎手練綱口公卿以下咸憚之出爲廣東右叅政英宗復位召爲左僉都御史逾年卒

左渙

按萬姓統譜渙涇縣人監察御史景之子家承清白嘗蔬食布衣以吟咏自怡景泰間奉旨從父鎮守白羊關日與軍士操練以捍北寇再歲乃還居城市中卓有行義

左忠

按萬姓統譜忠涇縣人性孝友能記誦尤精於醫每施藥以濟貧病分田以恤族人戊辰江南饑甚省儲煮粥以哺流徙魏巡撫聞之復其身年七十卒有醫方行於世

左贊

按萬姓統譜贊字時翊南城人天順進士歷吏部郎中豪邁不羈至其爲文謹繩尺崇理致尤精於隸端重奇古

左韶

按萬姓統譜韶涇縣人性樸實以訓蒙爲業必教之孝弟左族子姓多賴陶成兄弟俱登科第跡不至公門累預鄉飲遇恩冠帶年八十有四卒

左鈺

按萬姓統譜鈺阜城人成化進士初任御史言諸臣請革番僧名號疏上聞陛下謂所言有理及該部奏行發遣陛下又謂失遠人之心臣以爲陛下不忍失遠人心乃忍失邇人心乎不報歷官右僉都御史

左達

按莘縣志達字士亨成化庚子科舉人吉州學正居家至孝所著有禮題一覽禮題捷徑講藝學者宗之

左唐

按萬姓統譜唐字堯卿江都人弘治丙辰進士歷參政

左輔

按萬姓統譜輔字弼之涇縣人由進士除浮梁知縣裁省冗費時景德鎮民相構爲亂輔爲開諭區畫衆遂解以忤中貴調景陵知縣綽著能聲陞瑞州府同知逆瑾中貴來籍黃侍郎家慘刻殊甚輔

恤其孥且不賄附謫南安府學教授再謫南城縣學訓導日與諸生講論不輟瑾誅起用以疾辭陞授寧州知州致仕爲人恬靜端慤孝友廉慎探究性理晚年玩太極圖說充然有所得著有周易本義附說太極後圖南庠日講行於世

左仲輝

按萬姓統譜仲輝號蒙齋涇縣人彭教榜進士除戶部主事歷郎中擢湖廣永州府知府時新建藩府王欲闢地仲輝奏止之以外艱歸改知彰德府藩府之擾尤甚經理有功置泉陂溉田惠民歲凶多方賑濟民賴以蘇致仕年八十餘卒

左然

按萬姓統譜然字允之涇縣人激之孫家傳易學銳意精研由進士除戶部主事陞員外郎謙恭渾厚爲堂卿葉公淇器重卒於京所著有賞溪吟稿

左鑑

按萬姓統譜鑑字應衡號東井涇縣人少博學能文以易經舉嘉靖壬辰會試三名初任南京戶部

古今圖書集成
主事改兵部武選司主事秩滿入制勅房管理誥敕歷尙寶卿年三十二卒

左國璣

按萬姓統譜國璣字舜齊大梁人能書善詩賦名動一時年幾四十始舉於鄉有一元集

左思忠

按萬姓統譜思忠字良臣嘉靖進士累官吏部員外爲人敦厚持正好學以詩文名

左思明

按陝西通志思明五河耀州人嘉靖甲午舉人爲永城令陞雲南趙州守歷有政績

左鈞

按萬姓統譜鈞保定人嘉靖丙戌進士歷戶部主事

左重

按明外史張振德傳天啟元年奢崇明部將樊龍叛灌縣知縣蒙化左重率壯士追擊賊於成都力戰馬蹶罵賊死